

Sabin Intxaurreaga: «Drogak tartean direla bizitzen jakin behar du gizarteak»

Jaurlaritzak 5.000 milioi pezeta bideratu ditu Drogei Buruzko Plana finantzatzeko

Luis Karlos Garcia / Gasteiz

Droga-menpekotasunari Buruzko Hiru Urteko IV. Plana aurkeztu dute. Eusko Jaurlaritzaren Gobernu Batzordeak onartu zuen iragan aste-

artean, eta laster Eusko Legebiltzarrera igorriko du komunikazio gisara talde parlamentarioek eztabaidatu nahiz aberastu dezaten. Plangintza-aren helburua da drogekin zerikusi duten erakundeek «ekinbide guztiak

koordinatzea, ahalik eta eraginkortasun handiena lortzeko». Guztira 355 programa aurreikusi dituzte, eta 5.000 milioi pezeta bideratuko dituzte ekintzak finantzatzeko (200 milioi libera).

KONTXI GABANTXO Eusko Jaurlaritzako Droga-menpekotasunari buruzko idazkari nagusia prentsaurrekoan agertu zen atzo, Lakuan, Sabin Intxaurreaga Justizia, Lan eta Gizarte Segurantzakontseilariak eta Angeles Iztueta Arazo Sozialetako sailburuordeak lagundurik. 2000. urtetik 2002ra bitartean indarrean izango den plangintza-aren nondik norako oinarritzkoenak eskaini zituzten.

Intxaurreagak nabarmendu zuen aurrerapauso handiak eman direla droga-menpekotasunaren kontrako borrokan, baina garrantzitsuenak gizarteak «sentiberatasuna» hartu izana izan dela erantsi zuen. Sailburuak botere publikoen aldetik «neurri eraginkorrak» agindu bazituen ere, gizarteari gomendatu zion «drogak tartean izanik bizitzen ikasteko».

Prebentzio lana bultzatuko dute

Kazetariak datuak eskatuta, Gabantxok adierazi zuen planak ez duela egoerari buruz halako irudi estatistikorik emateko helbururik, baizik eta erakunde guztiek bultzatzen dituzten ekimenak ego-

kiak izan daitezen laguntzea. «Ekintzen eraginkortasuna du jomuga funtsezkoena», esan zuen Droga-menpekotasunari buruzko idazkari nagusiak.

Horretarako, hiru lan ildo nagusi zehaztu dira: sorospena, droga hartzailearen

gizarteratzea eta prebentzioa. Arazoari aurrea hartzeko lanak berebiziko garrantzia du (17 neurri planteatu ditu, hots, beste bi ataletan batera proposatutako kopurua).

Ildo horretan, Gabantxok azaldu zuen planari mugitu

ahal izateko modua emango diotela, unean uneko doikuntzak indarrean ezartzeko xedez: «Balio duten eta balio ez duten programak zeintzuk diren jakin nahi dugu datozen hilabeteetan». Esate batera, prebentzioari buruzko jardunak makina bat



PAULINO ORIBE / EFE

Angeles Iztueta Arazo Sozialetako sailburuordea, Sabin Intxaurreaga Justizia, Lan eta Gizarte Segurantzakontseilariak eta Kontxi Gabantxo Droga-menpekotasun Arazoetako idazkari nagusia, atzoko aurkezpenean.

«Behetik gora» egindako plana

Gabantxoren arabera, plangintza-aren bertuteetako bat da helburuak ez dituela Gobernuak berak jarri: «Lan ildo nagusiak Administrazioen eta alorreko teknikarien artean hitzartu baitira». Bide beretik, Iztueta sailburuordeak nabarmendu zuen «behetik gora eraikitako plana» izan dela.

IV. Planak 5.000 milioi pezetako aurrekontua izango du. Diru gehiena Jaurlaritzak jarriko du (3.400 milioi): Osakidetza 1.300 bideratuko dituzte, Hezkuntza Sailera 800dik gora, Enplegu eta Heziketara 500 eta Ongizatera 300, besteak beste. Halaber, diputazioek 600 milioi ipiniko dituzte eta udalek mila milioi.

Gobernuko arduradunen esanetan, plangintzak honako hiru alor hauetan jardungo du nagusiki: droga legalen nahiz ilegalen gehiegizko kontsumoaren gainean, jokaera horiekin batera datozen kalte jakin batzuen inguruko borrokan eta droga-menpekotasuna dela-eta gizarteak konpromiso jarrera irmoa har dezan. Gabantxoren arabera, funtsezkoa da horretan aritzea.

Gabantxok ez du baztertu narko-gelen proposamena

KONTXI GABANTXO Droga-menpekotasunari buruzko idazkari nagusiak ez du baztertu heroina hartzen dutenentzako narko-gelak abian jartzeko aukera: «Aztertu egin beharko dugu zein den heroinazaleei laguntzeko modurik onena».

Heroina hartzen dutenen kopurua dezente jaitsi da azken urteotan, baina, dena den, Gabantxok azaldu zuenez, «ezin uka liteke oraindik kontsumoa badagoela». Ildo horretan, gaur egun Euskal Autonomia Erkidegoan 4.000 heroinazale daudela kalkulatu zuen, eta politikak taxutzean datu objektibo hori gogoan hartu behar dagoela gaineratu.

Gabantxok uste du helburu jakin bati eutsi behar zaiola, hots, «kalte guztien beherakadari». Ikuspegi hori buruan, gizartea pixkanaka hainbat proposamen onartzen joango dela dio; narko-gelei buruzkoa, adibidez.

%6tik %4ra jaitsi da gehiegi edaten dutenen kopurua

EDARI alkoholodunen kontsumoaren aurkako borrokan arreta berezia dute jarrita erakundeek. Sabin Intxaurreaga kontseilariak pozik agertu zen droga batzuetan kontsumoak behera egin duelako. Gabantxok zehaztu zuenez, alkoholaren kontsumoa asko jaitsi da, neurri kanpo hartzen dutenen kopurua %6tik %4ra pasatu baita. Hala ere, erne jarraitu behar dagoela esan zuen, asteburuotako kontsumoa urte batetik bestera gora doalako etengabe.

Bestalde, 15 eta 24 urte bitarteko gazteen gaineko datuak eskaini zituzten: bi herenek edaten dute asteburuotan eta jaiegunean, %15 inguruk gehiegi edaten dute asteburu bakoitzean, eta beste horrenbestek diote azken urtean bost aldiz baino gehiago mozkortu direla. Gazteek edari alkoholodunak hartzea da Jaurlaritzaren «kezka nagusietako bat».

Tabernetan-eta izatea gazteen aisialdiko ekintza gogokoena

GAZTEEK aisialdian denbora gehien taberna, kafetegi, dantzaleku eta mota bereko tokietan egiten dute. Izan ere, EAEko 15 eta 24 urte bitarteko gazteetako %7,7 besterik ez dira inoiz horrelakoetan izan. Gainera, nerabeetako %14k hamar ordutik gora ematen dituzte leku horietan asteburu bakoitzean. Adin tarte horretako herenak baino gehiagok tabakoa erretzen dute, eta %40k baino gehiagok droga ilegalen bat hartu dute noizbait, eta kasu gehienetan marihuana izan da. Bestalde, %3,4k egunero erretzen ditu porroak eta %5,1ek astean behin baino gehiagotan. Era berean, %11k hartu dute speed, edo anfetamina, baina oso gutxi diote azken hilabete honetan behin baino gehiagotan hartu dutela; estasi-a, berriz, %4k probatu dute. Guztiok Gabantxoren eta Intxaurreagaren agerraldian emandako datuak dira.